

Gui'ch yaløj bacaa San Pedr

Rxhiaal Bëd xtiidx Dios loj ree bejn

¹ Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zojbidi guiedx ríga' ree niz Ponto, Galacia, Capadocia, Asia Menor në Bitinia.

² Ma gulej dux Dad ree Dios lëjt diizd gocli, zi'c goc xixgabaman. xSprijtaman gulëëca lëjt din guzoobidi diidx gac tëë luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëëman luxdoodi.

Ni ralëjz ree gunee Dios

³ Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios.

⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan.

⁵ Guial rlıladxidi Dios, laaman rniaj lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

⁶ Zeel rabaa da'tidi majsi tëdidi graloj guialrzagdiaj tıbladëd,

⁷ din por guialrzagdiaj guin guiguien chu diidxli rlıladx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax

or. Or guin najn ni rnidloj, zeel mazri lasajc guialrliladx laaman, bal chu taan xhietëez loj guialrza-gdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdxë gap tëë reeman laaman respejt guial rusnuu rliladxidi laaman.

⁸ Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi,

⁹ din lëjt ragbee, guial rliladxidi, ma nünj Dios lëjt cwent zi'c ree bën achet xtol.

¹⁰ Diizd gocli, bën badëë ree xtiidx Dios loj ree bejn basiid reeman been tëë reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c.

¹¹ Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tëë gac zian.

¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëed xanyabaa. Në ree anjl ma rën nejzdoo gagbee nine ree.

Ze rayal guiban ree xi'n Dios

¹³ Zeel gol guzusin gol bastëdguien tëë, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb.

14 Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman.

15 Laaman gule lëjt, zeel gol been naguiejn guibandi naya delant lojman, din laaman naj Bén naya nali.

16 Zi'c rëb loj xtiidxaman: “Gol gubajn naya delant lon, din naj naj Bén naya nali.”

17 Yan bal rnieedi Dios “Dad”, Bén rüjn xguial-guxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie.

18 Din lëjt ragbee guial babëëman lëjt loj costumbr ni basa'nnë ree xbéngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rnijt, zi'c or o plajt ya,

19 gojx con xrejn za'cdxoon Jesucrist ni guxie'man loj crüzj chi gütaman zi'c tijb xiil zagdxe be ad naxint, be rugüjt reeman par Dios por xtol ree bejn.

20 Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lëjt.

21 Zeel por laaman rliladxidi Dios Bén basban laaman badëë tëëman gualrniabee lojman, yan con guidib luxdoodi ma rliladxidi Dios rbëz tëëdi ni guneeman.

22 Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi.

23 Din ma bidxaa mod nabandi, zi'c rulüü gojlidi

stijb, abi' guialnaban zinalidi ad zëëdtan por tijb bën nit, zëëdan por xtiidx Dios, diidx naban, diidx ni ad zanijt,

²⁴ din loj xtiidxaman rëb:

Gra bénguidxliuj naj zi'c gui'xh dajn,
guiáad ni rajp reeman naj zi'c xguiaa gui'xh guin.
Rbidx gui'xh guin, abi' riajb xguiaan,
²⁵ per xtiidx Dios ad yu't dxej nitan.
Abi' laan naj xtiidxza'c Jesucrist ni ma biguiejndi.

2

¹ Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguijdx lasa'di.

² Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb,

³ bal walidi ma ragbeedi guial naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tibläd, per par Dios najman bën lasajc, laaman gule laaman.

⁵ Ziangajc lëjt, guial ma rliladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëëdi lojman zi'c gon por Jesucrist.

⁶ Rëb loj xtiidx Dios:

Gol baguiaa, guzoban tijb guiaj zagdxe luguiedx Jerusalén.

Laan naj guiaj nabee, guiaj zøjbloj, nilasajc tää.
Bal chu chililadx laan,
ad yu't dxej yaya'nxtuman.

⁷ Par lëjt, guial rliladxidi Jesucrist, laaman naj
zi'c guiaj lasajc da't. Per par ree bën ad rliladxt rajc
cumplid ni rëb loj xtiidx Dios, lod rëb:
Guiaj ni gulëëgo'n ree bën rüjn yu,
yan laan naj guiaj zøjbloj.

⁸ Rajc tää cumplid ni rëb stib lajt loj xtiidxaman,
rëban:
Laaman naj guiaj rirejl guia' ree bejn,
abi' rureeyujn laa reeman.
Rzajc reeman zian, guial ad ruzoobt reeman xti-
idx Dios, zian rajc ni rëbaman xcwent reeman.

⁹ Per lëjt naj bën guleman, najdi bixhioz rüjn ree
sirv lojman, guial najman dux rey ree. Lëjt ma
naya luxdoo delant lojman, abi' gulejman lëjt din
chigtie'chidi diidx xcwent ree ni zagdxe rüjnman.
Laaman babëë lëjt loj nejz mal, persi bagu'man lëjt
loj xnejz za'cdxoonman.

¹⁰ Gocli achutczi najdi, per yan ma najdi xbejn
Dios. Gocli ad ragbeetidi guial raya Dios lëjt, per
yan ma ragbeedi.

Zi'c rayal guiban ben rliladx Dios

¹¹ Gradi compniar raliduladx ree Jesucrist, rni-
aaban favor lojdi, zi'c zio'p ree loj guidxliuj guie
tibrajtzi, ad bal tiëbidi güün ree xgab mal lëjt gan,
din xgab mal guin ree rüjn naguiejn zianczi din
gusa'n ree bejn xnejz Dios.

¹² Gol gubajn zagdxe loj ree bën ad nünbeet
laaman, zian majsi rnieeguijdx reeman lëjt yan,
rëb reeman najdi benmal, per chi guguaa reeman

guial zagdxē naj ni cayüjndi, dxel guza't reeman laaman zagdxē, dxēj ni yadëēd reeman cwent lojman.

¹³ Guial rliładxidi Dad Jesucrist, gol bazoob xtiidx gra ree bēn rniabee loj guidxliuj guie. Gol bazoob xtiidx pristent rniabee xnaciondi

¹⁴ nē xtiidx gobernador bēn rxhiaalaman din gudëēdaman casti bēn rüjn ree ni mal guilies tēēman xvalor ree bēn rüjn ni zagdxē.

¹⁵ Din rēn Dios güündi ni zagdxē ree din gucwëēzidi ro' ree bentont ad rignia't abi' rnieguijdx reeman lējt.

¹⁶ Zajc güündi zi'c rēndi, per ad por ziantzi güündi ni naj ni mal, gol been zi'c rayal güün ree xbejn Dios.

¹⁷ Gol gojp respejt gra bejn zi'c rayal, gol guyēn ree bēn rliładx Jesucrist, gol bidxeb Dios, gol gojp tēē respejt pristent rniabee xnaciondi.

Gol gudaan loj guialrzagdiaj

¹⁸ Lējt bēn naj ree mojs, gol bazoob xtiidx ree xpatrondi, gol gojp tēē reeman respejt, ad bēn najtzi ree benza'c raya tēē reeman lējt, nē ree bēn naj bendxuudx.

¹⁹ Din zagdxē naj guial chu rdaan loj guialrzagdiaj, majsi ad rayaltaman laan, rdaanman laan guial rēnman güünman ni ruladx Dios.

²⁰ Bal chu lējt rzagdiaj por ni mal rüjndi, achet lasajcan, per bal rzagdiajdi por ni zagdxē rüjndi abi' rdaandi loj guialrzagdiaj guin, laan lasajc delant loj Dios,

²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman.

²² Ad yu'tczi dxej beenman dol abi' ni'qui tijb diidx rusquiee ad briit ro'man.

²³ Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bën rüjn xguialguxtis zi'c rayal.

²⁴ Guzagdiaj Jesucrist loj crüzj por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjnman du luxdoo ree naya.

²⁵ Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tëëman lëjt zi'c tijb bën rajp xiil.

3

Zi'c rayal guiban ree bën ca' lasa'

¹ Në lëjt béngunaa ma yu' ree lacheel, gol bazoob xtiidx lacheelidi, din bal chu lacheelidi ad rliladxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiëbidi loj reex,

² chililadx reex guial guguaa reex nabandi zi'c rayal rajp tëëdi laa reex respejt.

³ Chi rzujchaawidi, ad bal rdëdlaj rüjnchaaw guidxguijquidi ni'qui guial güündi ujs ganax ni or o gacwidi ganax lajd lasajc.

⁴ Mazri zagdxe naj guial güündi naguiejn gac luxdoodi naya delant loj Dios, gol gojc benza'c në

bén chaawladx, din laan ad yu't dxej nitan, abi' laan mazri lasajc delant lojman.

⁵ Din zian gubajn ree béngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman.

⁶ Zian been Sara, bazoob xtiidx lacheelaman Abraham, abi' guneeman laaman “Dad”. Gaquidi zi'c xi'n Sara, bal rüjndi ni zagdxe sin guialrdxeb.

⁷ Ziangajc lëjt xinguaaw, gol gubajnnë lacheelidi zagdxe, gol gojp reeman respejt ad guialzi najt reeman bén nada, rayal güündi zian guial në reeman rayal guialnaban tiblyaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guiniabidi laaman.

Xhie rayal güündi chi xhie güün në reeman lëjt

⁸ Zeel rnin loj gradi: Gol gubajnnë lasa'di zagdxe, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në bén chaawladx.

⁹ Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt.

¹⁰ Din rëb loj xtiidxaman:

Bén rën guiban zagdxe chu' tëë luxdooman zagdxe, rayal gapaman cudad ad guinieeman diidxguijdx ad guiniee tëëman diidx rusquiee.

¹¹ Cwëëladxaman ni mal, güünman ni zagdxe güün tëëman naguiejn guibannë ree lasa'man zagdxe, zian rayal guibanman zianczi.

¹² Din dux Dad ree Dios rnijad bén rüjn ree ni rënman rüjncwent tëëman xtiidx reeman chi

rbejdx reeman laaman, per ralenman b́en
rűjn ree ni mal.

¹³ Achut gűn lűjt ni mal, bal cayűjndi naguiejn
gűndi ni zagdx.

¹⁴ Per xiquilbaadi bal cusagdiaj bejn lűjt guial
cayűjndi ni zagdx. Ad chu'di xgab ad guidxeb
tűedi por zian,

¹⁵ gol gojp respejt gol badxe'guijc tűe dux Dad
ree Jesucrist. Gol guzujsin din yadxi'di xtiidx ree
b́en guiniabdiidx lojdi xcwent ni rliladxidi, per gol
badxi' xtiidx reeman zagdx con diidx zagdx ree.

¹⁶ Gol gubajn zagdx din guiguien guial achet ni
mal yu'guijquidi din yaya'nxtu ree b́en rnieegui-
jdx lűjt, guial rűjndi ni zagdx rliladx tűedi Jesu-
crist.

¹⁷ Mazri zagdx naj sagdiaj bejn guial gűnman
ni zagdx, bal zian rěn Dios, luar sagdiajman guial
gűnman ni mal.

¹⁸ Din xt Jesucrist guzagdiaj, gűjtaman tib voltzi
por dux tol ree majsi ad beentaman dol, per
gűjtaman duxcwent ree nayajc ree b́endol, zian
guxhalaman nejz din gac yadxin ree loj Dios,
gűjtaman zi'c b́enguidxliuj per babanman por xSpri-
jtaman.

¹⁹ Chi gadaman yaban, wej xSprijtaman
bigneenėman xsprijt ree bengűt lod nayaaw
reeman.

²⁰ Sprijt guin ree naj xsprijt ree b́en ad bazoobt
diidx tiamp gulal, chi guban Noė loj guidxliuj
guie, chi gop Dios laa reeman pasens la'tgaj cayűjn
Noė barcw, abi' xhujnzi bejn gulaa loj nijs banijt
guidxliuj tiamp zii.

²¹ Nijs guin naj zi'c guialrirobnis ni rulüü guial ma nayajc ree perdon. Guialrirobnis guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiarguiejn ree, guial ma raya'p ree guialnaban cüb guial baban Jesucrist loj ree bengüt,

²² bën bayë'p xanyabaa abi' za'man xladbee Dios lod canabeeman anjl ree në ree sprijt ca' guialrniabee.

4

Gol beennë quiarguiejn ni banee Dios dxiin

¹ Zeel zi'c gudëd Jesucrist loj guialrzagdiaj, në lëjt rayal taan lojn. Din por guialrzagdiaj guin rüjn bejn dol tibläd,

² din güünman zi'c rën Dios guidib xguialnabanman luar güünman zi'c naj xixgabaman.

³ Xchej da't gubajndi zi'c naban ree bën ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdx da'tidi, guyën tēëdi ni ad najt ree Dios, laan naj ni rbijxhlädx Dios.

⁴ Per yan guial ad zinaltridi zi'c naban ree bën naban zian, zeel radxa loj reeman, rnieeguijdx tēë reeman lëjt.

⁵ Per rayal yadëed reeman cwent loj Dios bën za' par güün xguialguxtisaman con ree bën naban në ree bën ma güjt.

⁶ Din në ree bën ma güjt biguiejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

⁷ Ma zidyob dxej nit guidxliuj, zeel gol bastëdguien gol guzujsin tëë din cwedx guiniabidi Dios con guidib luxdoodi.

⁸ Ad yayanladxidi guial guiën lasa'di zi'c rayal, din bën rën lasa' rünman perdon majsi xhietëëz rünne reeman laaman.

⁹ Bal yu' tijb xcompniaridi rniab luar lidxidi din yaya'nman, gol badëëdsii lidxidi con guidib luxdoodi ad yaleny'a'di.

¹⁰ Loj tijb gajdi ma banee Dios quiarguejn din güüнди ni rayal güüнди. Zeel gol been lasa'di yudar con ni rajc rünjdi, din guiguien guial cayüjndi zi'c rayal con quiarguejn ni bazaladxaman lojdi.

¹¹ Bal chu lëjt ca' quiarguejn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bën ca' quiarguejn par güünman yudar dux compniar ree, rayal güünman laan con gojl razaladx Dios lojman. Gra ni cayüjndi, gol beenan din guza't ree bejn Dios zagdxë por Jesucrist, bën rayal respejt në guialrniabee zianczi. Amén.

Gol gudaan gra guialrzagdiaj

¹² Gradi compniar raliduladx ree Jesucrist, rënan lëjt, zeel rnin lojdi, ad ru nawëëguidi guial zro' naj loj guialrzagdiaj cadëdidi, din laan naj zi'c prueb par lëjt. Ad rudi xgab chexc zeel cazajquidi zian.

¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb.

¹⁴ Xiquilbaadi bal chu na diidxguijdx lojdi guial zinalidi Jesucrist, din gra dxejczy za'në xSprijt Dios lëjt, bén ca' guialrniabee.

¹⁵ Achet lasajc bal cazagdiajdi guial bagüjtidi bejn, o por guialgubaan, o por guial rüjndi ni mal o guial rudi lod ad rayaltidi.

¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudëëman quixtëë loj Dios guial ma najman xbejn Jesucrist.

¹⁷ Gol gogbee, guial rtiëjb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczy naag sac ree bén ad rënt guzoob xtiidxza'caman.

¹⁸ Nacli ree bén zinal xnejz Dios nawëëg naj guial yaguaiaj reeman xanyabaa, piorli ree bëndol bén ad nünbeet ree Dios, xhieczy naag naj luar lod yayal reeman.

¹⁹ Zeel bén cazagdiaj ree zi'c naj xixgab Dios, rayal gusnuu güün reeman ni zagdxe gusa'n tëë reeman gran loj Dios, laaman gagnë laa reeman. Laaman bazaladx guialnaban rüjn tëëman zi'c rayal.

5

Consejw par ree bén rliladx Jesucrist

¹ Yan rënan gudëdan consejw loj ree bén rniabee ree lojdi, naj guial ca'n guialrniabee zi'cgajc laa reeman, naj tëën testiw xcwent ni guzagdiaj Jesucrist, zi'cgajc laa reeman guguiän xbianiman dxej gui'taman stijb, zeel rënan guiën nine ree loj reeman.

² Rnin lojdi, gol gunaj ree xbejn Jesucrist, bén rayal ree gulüüdi din gusnuu chinal reeman xnejz

Dios. Ad güündi dxiin guin guialzi ragbeedi rayal güündi laan, gol beenan guial yu'di gan güündi laan, con guidib luxdoodi gol beenan, ad bal güündi laan guialzi rzëëbladxidi milia.

³ Ad guial ca'tidi guialrniabee din nabeedi zi'c tal rëndi, rayal guibandi zagdxë din guguaa ree bën rliladx Jesucrist din guiban reeman zian,

⁴ din chi gui't bën rniabee dunuj ree stijb, dxel guneeman tijb niza'cdxoon ni ad yu't dxej nit.

⁵ Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tëë xtiidx ree xcompniaridi, din:

Ralen da't Dios bën rüjn ree benro',
per dád benza'can con ree bën rüjn naya.

⁶ Zeel gol been naya loj Dios, bën ca' gra guialrniabee, din guiliesaman xvaloridi chi guidxin dxej.

⁷ Gol basa'n gra xgab yu'di loj Dios, din laaman rnij lëjt.

⁸ Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliian, rguilix chu güünx gan.

⁹ Zeel ad tiëbidi güünx lëjt gan, gol guzujdxi'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bën rliladx Jesucrist guidib guidxliuj.

¹⁰ Per chi ma gudëdidi ta'n loj guialrzagdiaj, dxel gagnë Dios din gusnuu güündi naguiejn guibandi zi'c rënman, su tëëdi rejs, sudxi'chidi, gap tëëdi segur guial zinalidi xnejzaman. Laagajcaman naj Dios cayüjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist.

¹¹ Laaman rayal respejt, din tijbzi laaman ca' guialrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bèn ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nètëë par gugojnan lëjt guial diidxli rën Dios lëjt, zeel gol basnuu gol guyënman gol guyën tëë lasa'di.

¹³ Bèn rliladx ree Jesucrist, bèn ma gulej Dios zi'cgajc lëjt, bèn zojb ree Babilonia, rugajpdioz reeman lëjt. Në Marcw xin nūnan zi'c da xi'nan rugajpdioz lëjt.

¹⁴ Guial rën lasa'di, gol bagajpdioz lasa'di xhi-etëëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

fb4ebcb8-e1f4-5bfc-b08c-f590e137d86d